

II. AUTORIDADES E PERSOAL

b) NOMEAMENTOS

INSTITUTO GALEGO DE PROMOCIÓN ECONÓMICA

Resolución do 20 maio de 2009 pola que se lle dá publicidade ao acordo do Consello de Dirección do Instituto Galego de Promoción Económica de nomeamento de director xeral deste instituto.

En virtude do establecido nos artigos 12 da Lei 5/1992, do 10 de xuño, de creación do Instituto Galego de Promoción Económica, e 10 do Decreto 317/1992, do 12 de novembro, que aproba o seu regulamento, por proposta do presidente e logo da deliberación dos membros asistentes, o Consello de Dirección do Igape adoptou na xuntanza do 15 de maio de 2009 o acordo de cesamento e nomeamento do director xeral.

Para os efectos do seu xeral coñecemento e de conformidade coas facultades que teño conferidas,

RESOLVO:

Único.-Publicar o nomeamento de Joaquín Varela de Limia de Cominges como director xeral do Igape con efectos desde o día 18 de maio de 2009, acordado polo seu Consello de Dirección na súa xuntanza do 15 de maio de 2009.

Santiago de Compostela, 20 de maio de 2009.

Javier Guerra Fernández
Presidente do Instituto Galego de Promoción
Económica

III. OUTRAS DISPOSICIÓNS

CONSELLERÍA DE SANIDADE

Orde do 7 de maio de 2009 pola que se fixa o prezo de venda ao público da publicación Patoloxías evitables con hábitos de vida saudables.

A Lei 6/2003, do 9 de decembro, de taxas, prezos e exaccións reguladoras da Comunidade Autónoma de Galicia, no seu artigo 51 sinala a obriga de que os prezos privados sexan fixados polas consellerías correspondentes, logo de informe favorable da Consellería de Facenda, e publicados no *Diario Oficial de Galicia*.

Para cumprir este mandato, e despois de emitido informe favorable da Consellería de Facenda, esta consellería

DISPÓN:

Artigo único.

1. Queda aprobado o prezo de venda ao público da publicación editada pola Consellería de Sanidade e que se relaciona no anexo.

2. Este prezo entenderase, de ser o caso, co IVE incluído.

Santiago de Compostela, 7 de maio de 2009.

Mª del Pilar Farjas Abadía
Conselleira de Sanidade

ANEXO

Patoloxías evitables con hábitos de vida saudables:
14 euros.

AXENCIA DE PROTECCIÓN DA LEGALIDADE URBANÍSTICA

Resolución do 14 de maio de 2009 pola que se ordena a publicación do convenio de adhesión á Axencia de Protección da Legalidade Urbanística do Concello de Verín.

O día 30 de xaneiro de 2009 a axencia e o Concello de Verín asinaron o convenio de adhesión dese concello á Axencia de Protección da Legalidade Urbanística.

De conformidade co establecido no artigo 9.1º dos estatutos da axencia aprobados polo Decreto 213/2007, do 31 de outubro, dispoño a súa publicación no *Diario Oficial de Galicia*.

Santiago de Compostela, 14 de maio de 2009.

Hipólito Pérez Novo
Director da Axencia de Protección da Legalidade
Urbanística

CONVENIO DE ADHESIÓN Á AXENCIA DE PROTECCIÓN DA LEGALIDADE URBANÍSTICA

Santiago de Compostela, trinta de xaneiro de dous mil nove.

Interveñen:

Dunha parte, Juan Manuel Jiménez Morán, alcalde do Concello de Verín, provincia de Ourense, en representación do concello, de conformidade co disposto no artigo 61 da Lei 5/1997, do 22 de xullo, de Administración local de Galicia, e no artigo 21 da

Lei 7/1985, do 2 de abril, reguladora das bases de réxime local.

E doutra parte, Hipólito Pérez Novo, director da Axencia de Protección da Legalidade Urbanística, en representación do ente público, de conformidade co disposto no artigo 18 dos estatutos aprobados polo Decreto 213/2007, do 31 de outubro.

Expoñen:

1º A Lei 9/2002, do 30 de decembro, de ordenación urbanística e protección do medio rural de Galicia, modificada pola Lei 15/2004, do 29 de decembro, no seu artigo 226, establece que a Axencia de Protección da Legalidade Urbanística é un ente público de natureza consorcial, dotado de personalidade xurídica, patrimonio e orzamento propios e plena autonomía no cumprimento das súas funcións, para o desenvolvemento en común pola Administración autonómica e os concellos que voluntariamente se integren nela das funcións de inspección, restauración da legalidade e sanción en materia de urbanismo e o desempeño de cantas outras competencias lle asignan os seus estatutos.

Así mesmo, establece que son membros da axencia a Administración autonómica e os concellos que voluntariamente se integren nela. A incorporación dos concellos realizárase a través do correspondente convenio de adhesión, que deberá obter a aprobación previa do Pleno da Corporación e do Consello da Xunta de Galicia e será publicado no *Diario Oficial de Galicia*.

Os estatutos da Axencia de Protección da Legalidade Urbanística foron aprobados polo Decreto autonómico 213/2007, do 31 de outubro, e publicados no *Diario Oficial de Galicia* número 222, do 16 de novembro.

2º O Concello de Verín ten atribuídas competencias en materia de disciplina urbanística, en virtude do disposto no artigo 80 da Lei 5/1997, do 22 de xullo, de Administración local de Galicia, no artigo 25 da Lei 7/1985, do 2 de abril, reguladora das bases de réxime local, e nos artigos 209 e seguintes da Lei 9/2002, do 30 de decembro, de ordenación urbanística e protección do medio rural de Galicia.

A Lei 7/1985, do 2 de abril, reguladora das bases de réxime local, no seu artigo 10, determina que a Administración local e as demais administracións públicas axustarán as súas relacións recíprocas aos deberes de información mutua, colaboración, coordinación e respecto polos ámbitos competenciais respectivos e que procederá á coordinación das competencias das entidades locais entre si e, especialmente, coas das restantes administracións públicas, cando as actividades ou os servizos locais transcendan o interese propio das correspondentes entidades, incidan ou condicionen relevantemente os das devanditas administracións ou sexan concorrentes ou complementarios dos destas.

O texto refundido das disposicións vixentes en materia de réxime local, aprobado polo Decreto legislativo 781/1986, do 18 de abril, no seu artigo 69, establece que as competencias compartidas ou concorrentes poderán ser exercidas conxuntamente pola Administración do Estado ou da comunidade autónoma e a local, mediante a constitución de entes instrumentais de carácter público ou privado.

3º En virtude do establecido nos artigos 222.2º e 226 da Lei 9/2002, do 30 de decembro, de ordenación urbanística e protección do medio rural de Galicia, a axencia exercerá as competencias que lle sexan delegadas polos concellos consorciados.

Neste sentido, o artigo 9 dos estatutos da axencia, aprobados polo Decreto autonómico 213/2007, do 31 de outubro, dispón que a adhesión necesariamente producirá a atribución á axencia das competencias de inspección, supervisión, sanción e restablecemento da legalidade urbanística que correspondan ao municipio integrado voluntariamente na axencia, nos supostos que determinan os artigos 209, 210 e 211 da Lei 9/2002, de ordenación urbanística e protección do medio rural de Galicia, segundo se establece no convenio de adhesión.

4º Este convenio de adhesión obtivo a aprobación previa do Pleno da Corporación municipal de Verín, en sesión que tivo lugar o 10 de novembro de 2008, co voto favorable da maioría absoluta do número legal de membros da corporación, de conformidade co disposto no 226.2º da Lei 9/2002, de ordenación urbanística e protección do medio rural de Galicia, e no artigo 215.3º da Lei 5/1997, do 22 de xullo, de Administración local de Galicia.

Así mesmo, obtivo a aprobación do Consello da Xunta de Galicia, na súa reunión do 30 de outubro de 2008, de conformidade co disposto no artigo 226.2º da Lei 9/2002, de ordenación urbanística e protección do medio rural de Galicia.

Os intervenientes recoñecen mutua capacidade para o outorgamento deste convenio de adhesión, de conformidade coas seguintes

Estipulacións:

Primeira.-*Incorporación á axencia.*

O Concello de Verín, provincia de Ourense, incorpórase e adhírese como membro da Axencia de Protección da Legalidade Urbanística, asumindo os dereitos e obrigas que disto derivan, de conformidade co estipulado neste convenio de adhesión e o establecido nos estatutos da axencia, aprobados polo Decreto autonómico 213/2007, do 31 de outubro, e na Lei 9/2002, do 30 de decembro, de ordenación urbanística e protección do medio rural de Galicia.

Segunda.-*Delegación de competencias.*

1. O Concello de Verín delega na Axencia de Protección da Legalidade Urbanística o exercicio das

competencias municipais de inspección, supervisión, sanción e restablecemento da legalidade urbanística establecidas nos artigos 209, 210, 211 e 222 da Lei 9/2002, do 30 de decembro, de ordenación urbanística e protección do medio rural de Galicia, en relación coas obras e usos do solo que se executen sen licenza urbanística ou sen axustarse ás súas condicións, sempre que estean situadas nalgunha das seguintes clases de solo:

a) Solo rústico ou non urbanizable, en calquera das súas categorías (artigos 15 e 32 e disposición transitoria primeira, punto 1 f) da Lei 9/2002).

b) Solo apto para urbanizar, sen plan parcial ou sen plan de sectorización, aprobado definitivamente (artigo 14 e disposición transitoria primeira, punto 1 d) da Lei 9/2002).

c) Los núcleos rurais tradicionais delimitados no planeamento urbanístico municipal (artigo 13 e disposición transitoria primeira, punto 1 e) da Lei 9/2002).

A axencia exercerá efectivamente estas competencias desde o día seguinte ao da publicación do convenio no *Diario Oficial de Galicia*.

2. Nesta delegación de competencias non está incluída a reposición da legalidade nin a potestade sancionadora en relación coas obras completamente rematadas antes da publicación deste convenio, que serán exercidas polo concello.

3. A resolución dos recursos administrativos interpostos contra os actos ditados pola axencia en exercicio de competencias delegadas corresponderá ao concello.

Para resolver o recurso deberá solicitarse informe da Axencia de Protección da Legalidade Urbanística. Cando se reciba o escrito de interposición de recurso na axencia, esta deberá remitir ao concello co seu informe e unha copia completa e ordenada do expediente administrativo.

4. A delegación de competencias poderá ser revogada en calquera momento polo Pleno da Corporación, coa maioría exixida no artigo 215.3º da Lei 5/1997, do 22 de xullo, de Administración local de Galicia. A revogación será efectiva unha vez comunicada á dirección da axencia e publicada no *Diario Oficial de Galicia*.

Terceira.-Contribución ao sostemento da axencia.

1. O Concello de Verín contribuirá ao sostemento da Axencia de Protección da Legalidade Urbanística coas seguintes achegas económicas:

a) O 50% do produto das multas coercitivas impostas pola axencia para a execución das ordes de reposición da legalidade ditadas no exercicio das competencias delegadas polo concello.

b) E o 50% do importe das sancións impostas pola axencia aos responsables de infraccións urbanísticas, en exercicio das competencias delegadas polo concello.

c) A cantidade de mil douscentos setenta e cinco euros (75 euros por 17 núcleos rurais) que será transferida polo concello á conta xeral da axencia antes de enviar ao *Diario Oficial de Galicia* o anuncio de publicación do convenio.

2. O importe das multas coercitivas e das sancións impostas pola axencia en exercicio de competencias delegadas polo concello serán ingresadas polos suxeitos obrigados directamente na conta xeral da axencia. No suposto de que non sexan aboadas en período voluntario, a axencia solicitará da Consellería de Economía e Facenda o seu cobramento pola vía de constrinximento.

Ao finalizar cada exercicio anual, a axencia transferirá ao Concello de Verín unha cantidade equivalente ao 50% dos ingresos percibidos polas sancións impostas en exercicio das competencias delegadas.

Cuarta.-Obrigas asumidas polo concello.

O Concello de Verín asume as seguintes obrigas:

a) Prestar a cooperación e asistencia activa que a axencia lle solicite para o eficaz exercicio das súas competencias.

b) Facilitarlle ao persoal da axencia o acceso inmediato aos expedientes de planeamento, xestión e disciplina urbanística, así como canta información, documentación e axuda material precise para o adecuado cumprimento das súas funcións.

c) Prestar o auxilio da Policía local para facilitar as inspeccións, executar as ordes de precintaxe de obras e identificar os responsables de posibles infraccións.

d) Absterse de outorgar licenzas urbanísticas que impliquen a legalización de obras e usos do solo respecto dos cales a axencia ordenase a súa demolición, cesamento ou restauración da realidade física alterada.

e) Solicitar informe da axencia previamente á resolución dos recursos administrativos interpostos contra os actos ditados en exercicio das competencias delegadas polo concello.

f) Contribuír ao sostemento económico da axencia nos termos establecidos no presente convenio de adhesión.

g) E respectar as estipulacións do presente convenio e o establecido nos estatutos da Axencia de Protección da Legalidade Urbanística aprobados polo Decreto autonómico 213/2007, do 31 de outubro.

Quinta.-Programa de incorporación.

A incorporación do concello á axencia será efectiva desde o día seguinte ao de publicación deste convenio no *Diario Oficial de Galicia*.

Os expedientes relativos ás obras en execución nas materias que son obxecto de delegación deberán ser remitidos á Axencia de Protección da Legalidade Urbanística no prazo dun mes desde a data de entrada en vigor deste convenio.

Sexta.-Prazo de vixencia do convenio.

Este convenio entrará en vigor o día seguinte ao da súa publicación no *Diario Oficial de Galicia* e o seu prazo de vixencia será indefinido.

A resolución deste convenio producirase no suposto de que o Concello de Verín perda a condición de membro da axencia por calquera das causas que se establecen no artigo 12 dos estatutos da axencia e cos efectos que o mesmo artigo dispón.

Sétima.-Interpretación do convenio.

As controversias que puidesen xurdir na interpretación deste convenio e a súa aplicación serán resoltas polo Consello Executivo da axencia, de conformidade co disposto no artigo 10 dos estatutos da axencia aprobados polo Decreto 213/2007, do 31 de outubro.

E para que así conste, asinan este convenio de adhesión, por duplicado exemplar, no lugar e data arriba indicados.

**INSTITUTO GALEGO DE
PROMOCIÓN ECONÓMICA**

Resolución do 18 de maio de 2009 pola que se fai pública a ampliación do límite de crédito dispoñible para as axudas ás iniciativas de difusión solicitadas ao abeiro da base reguladora dos incentivos a proxectos colaborativos de carácter empresarial (procedemento IG114-artigo 4).

Mediante Resolución do 5 de febreiro de 2009 publicouse a nova redacción das bases reguladoras dos incentivos económicos e das bases reguladoras dos procedementos de tramitación das liñas de axuda do Igape (DOG nº 31, do 13 de febreiro), adaptándose ao Regulamento (CE) 800/2006, do 6 de agosto, xeral de exención por categorías, e procedeuse á convocatoria para o exercicio 2009, en réxime de concorrencia competitiva, de determinadas liñas de axuda previstas nestas bases.

As ditas bases prevén que as convocatorias de axudas, que conterán en todo caso o prazo de pre-

sentación de solicitudes e os créditos asignados a elas, serán aprobadas mediante resolución do director xeral do Igape e publicadas no *Diario Oficial de Galicia*.

Tendo en conta o volume de solicitudes recibidas, parece oportuno incrementar o importe aprobado para as axudas ás iniciativas de difusión solicitadas ao abeiro da base reguladora dos incentivos a proxectos colaborativos de carácter empresarial.

Na súa virtude, e de conformidade coas facultades que teño conferidas,

RESOLVO:

Único.-Amplíase en 44.000 € o crédito dispoñible das axudas do Igape para o apoio ás iniciativas de difusión solicitadas ao abeiro da base reguladora dos incentivos a proxectos colaborativos de carácter empresarial, que se aboarán con cargo á partida orzamentaria 02.02E4/10/02-651800 dos orzamentos do Igape para 2009.

Santiago de Compostela, 18 de maio de 2009.

Joaquín Varela de Limia de Cominges
Director xeral do Instituto Galego de Promoción
Económica

**UNIVERSIDADE DE SANTIAGO
DE COMPOSTELA**

Resolución do 12 de maio de 2009 de modificación da Resolución do 31 de xullo de 2007 sobre delegación de competencias en determinados órganos universitarios.

En virtude das resolucións de 1 e 3 de abril de 2009, modificouse o número e denominación das vicerreitorías da Universidade de Santiago de Compostela, modificando a Resolución do 14 de xuño de 2006.

Deste xeito, suprímese a Vicerreitoría de Relacións Institucionais e créase a de Política Internacional, así como a Vicerreitoría de Economía e Financiamento pasa a denominarse de Economía, Financiamento e Infraestruturas, asumindo as competencias que tiña a anterior Vicerreitoría de Infraestruturas.

Cómpre, en consecuencia, modificar a resolución de delegación de competencias do 31 de xullo de 2007, publicada no DOG do 19 de setembro, e adecuala á nova estrutura organizativa.

Por todo o anterior, esta reitoría resolveu:

Primeiro.

Modificar o punto I da delegación de competencias a prol de vicerreitores/as e vicerreitores/as adxuntos/as. En concreto modifícase o artigo 4, letra A) da